

**SERVIZO DE
TURISMO****CONCELLERIA DE
TURISMO****CONCELLO
DE VIGO**

CONVENIO DE COLABORACIÓN ENTRE O CONCELLO DE VIGO E A UNIVERSIDADE DE VIGO PARA A REALIZACIÓN DE PROXECTOS E ACTIVIDADES NECESARIAS PARA A CONSOLIDACIÓN DA CANDIDATURA “ILLAS CÍES XEOPARQUE MUNDIAL DA UNESCO”

En Vigo, na data de sinatura dixital

REUNIDOS

Dunha parte, D^a Yolanda Aguiar Castro, que actúa en nome e representación do Concello de Vigo, en virtude da súa condición de Concelleira de Área de Política Social, Turismo e Xuventude, de acordo coa Resolución de data 20 de xuño de 2023 e posterior de data 28 de xuño de 2024 de delegación de competencias específicas do Alcalde, Área de Goberno de Política Social, Turismo e Xuventude, que establece na Concelleira Delegada da Área de Política Social e Turismo entre outras, a seguinte facultade: Dirección, impulso, coordinación e supervisión das liñas estratéxicas de actuación en materia de promoción Turística e posicionamento da cidade como destino turístico, conforme ao disposto no artigo 124.5 da Lei 7/ 1985, de 2 de abril, polo que se regulan as bases do réxime local, no artigo 61.1 da Lei 5/1997, de Administración Local de Galicia e no artigo 41.1 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais.

Doutra, D. Manuel Joaquín Reigosa Roger, Reitor Magnífico da Universidade de Vigo, que actúa en nome e representación da Universidade de Vigo, en virtude do Decreto da comunidade autónoma de Galicia 110/2022, do 9 de xuño, publicado no Diario Oficial de Galicia (DOG) núm. 117, do 20 de xuño de 2022, de acordo coas competencias que lle outorga o artigo 50 da Lei orgánica 2/2023, do 22 de marzo, do sistema universitario e o artigo 29 dos Estatutos da Universidade de Vigo, aprobados polo Decreto 13/2019, do 24 de xaneiro, e publicados no DOG núm. 38, do 22 de febreiro de 2019, con enderezo no edificio Exeria, campus universitario, 36310 Vigo,

Ambas partes recoñécense mutuamente capacidade legal suficiente para subscribir o outorgamento do presente convenio e

EXPOÑEN

I. Os municipios, para a xestión dos seus intereses e no ámbito das súas competencias, poden promover actividades e prestar servizos públicos que contribúan a satisfacer as necesidades e aspiracións da comunidade veciñal, segundo o previsto no artigo 25 da Lei 7/1985, do 2 de abril, reguladora das bases de réxime local (LRBRL).



**SERVIZO DE
TURISMO****CONCELLERIA DE
TURISMO****CONCELLO
DE VIGO**

O artigo 25.2. h) da Lei 7/1985, reguladora das Bases de Réxime Local atribúe ás administracións locais competencia en materia de información e promoción da actividade turística de interese e ámbito local. Asemade a Lei 5/1997, de Administración Local de Galicia, no seu artigo 80.2. n) regula como unha competencia local a xestión de actividades culturais e a ocupación do tempo libre e o turismo.

A Lei 27/2013, do 27 de decembro, de racionalización e sustentabilidade da Administración Local, dispón que as competencias atribuídas ás entidades locais pola lexislación autonómica anterior á entrada en vigor da citada Lei da Lei 5/1997, de Administración Local de Galicia, no artigo 80,2n) que atribúe aos concellos a xestión de actividades culturais e de ocupación do tempo libre e o turismo, continuarán exercéndoas, rexéndose pola indicada lexislación.

II. Pola súa parte, a Universidade de Vigo, de acordo co establecido no art. 2.2. c) da Lei Orgánica del Sistema Universitario, ten entre as súas funcións a xeración, desenvolvemento, difusión, transferencia e intercambio do coñecemento e a aplicabilidade da investigación en todos os campos científicos, tecnolóxicos, sociais, humanísticos, artísticos e culturais.

Asemade, o Concello de Vigo e a Universidade de Vigo asinaron o 1 de marzo de 1996 un Acordo Marco de Colaboración co obxecto de instrumentar e regular as súas relacións de colaboración e cooperación mutua, mediante a eventual subscripción de convenios específicos en cada caso.

A cláusula segunda do dito convenio establece que o propósito do acordo é o de realizar actividades e proxectos de forma conxunta entre ámbalas dúas institucións. Pola súa parte, a cláusula sexta do dito convenio establece que “cada un dos programas concretos de colaboración entre ámbalas dúas partes requirirá a elaboración dun convenio específico (...)”.

III. O Concello de Vigo na súa aposta e compromiso pola conservación, protección e promoción turística e medio ambiental sostible das Illas Cíes, que se atopan no termo municipal de Vigo, promove e lidera a proposta de candidatura do arquipélago como Xeoparque Mundial UNESCO.

A inscrición deste ben na Lista de Xeoparque Mundial presenta, entre outras moitas, as seguintes vantaxes:

- Confírelle á comunidade local a posibilidade de celebrar o ben como un dos sitios naturais máis importantes do mundo, coa promoción que iso supón para un dos principais símbolos da cidade de Vigo.
- Converte o ben nun emblema para a rede nacional de áreas e sitios protexidos, propiciando un maior e mellor recoñecemento e unha mellor protección do patrimonio natural.
- Estimula a cooperación de todas as administracións en favor da protección do ben.



SERVIZO DE
TURISMOCONCELLERIA DE
TURISMOCONCELLO
DE VIGO

- Ofrece a posibilidade de mobilizar fondos e apoio para a conservación e preservación do ben, especialmente, do Fondo Patrimonio Mundial.
- Permite difundir técnicas e prácticas de protección, conservación e xestión do ben.

O 22 de setembro do 2023 o Concello de Vigo aprobou en Xunta de Goberno Local unha Folla de Ruta para a realización de proxectos e actividades necesarias para a consolidación da candidatura “ Illas Cíes Xeoparque Mundial da UNESCO” co obxectivo de afianzar a súa candidatura e integrarse na Rede Mundial de Xeoparques. En data 29/09/23 mediante Resolución da Concelleira de Área de Política Social, Turismo e Xuventude resolve a constitución do comité de expertos xeocientífico e socioeconómico, así como do comité técnico que reúne a investigadores de diferentes áreas de coñecemento co fin de implementar unha estratexia baseada no patrimonio xeolóxico, a educación, a investigación e divulgación co fin de promover un desenvolvemento económico do municipio.

As actuacións que se realizarán están definidas baixo os seguintes eixos vertebradores:

1. **Coordinación e colaboración entre o organismo promotor e a comunidade científica, os axentes sociais e representantes políticos** do ámbito local, rexional e internacional que reforcen as alianzas e xunten esforzos para a consolidación da candidatura. A cooperación e o establecemento de alianzas entre todos os grupos de interese é esencial para levar a cabo estratexias e iniciativas de forma conxunta que permitan o desenvolvemento sostible do territorio.
2. **Investigación científico-técnica** sólida do Xeoparque Illas Cíes que apoiará a candidatura ao proporcionar evidencia do valor xeolóxico, natural e cultural que se atopa no territorio demostrando que o arquipélago cumpre cos criterios establecidos pola UNESCO para o seu recoñecemento. Realizaranse estudos onde se avaliará o patrimonio das Illas Cíes mediante a identificación do seu patrimonio, a súa vulnerabilidade ou a afectación do cambio climático e os riscos naturais cara a estes recursos, ademais de proporcionar información coa que se establecerán accións de protección, xestión e conservación do territorio. Tamén se identificarán rutas de sendeirismo xeoambiental, actividades de interpretación ambiental e oportunidades do xeoturismo. Ademais, as investigacións realizadas serán a base das accións de educación e divulgación do patrimonio do xeoparque, co que se desenvolverán programas educativos, materiais didácticos, actividades de sensibilización, entre outros.
3. **Promoción da educación e sensibilización** do público en xeral. Para iso desenvolveranse actividades, programas e recursos educativos nos que se divulgará o patrimonio xeolóxico, natural e cultural do Xeoparque, ademais de programas de difusión e comunicación para chegar a unha audiencia máis ampla. Realizaranse talleres, charlas, conferencias, seminarios e eventos educativos que aborden o patrimonio do arquipélago, sensibilizando ao público para garantir a súa conservación e preservación. Tamén se realizarán visitas guiadas e recorridos interpretativos ofrecendo unha maneira máis dinámica e interactiva de coñecer o



**SERVIZO DE
TURISMO****CONCELLERIA DE
TURISMO****CONCELLO
DE VIGO**

territorio e os seus valores. Elaborarase material educativo que proporcionará información sobre o patrimonio, a importancia da conservación e prácticas sostíbles. Realizaranse programas educativos en escolas e universidades onde se incluírán visitas de campo, proxectos de investigación e outras actividades prácticas. Lanzaranse campañas de sensibilización a través dos medios de comunicación e redes sociais para fomentar prácticas responsables e inculcar a importancia da conservación e uso adecuado dos recursos entre a poboación e os visitantes do parque. Tamén se involucrará á comunidade local en actividades de voluntariado e educación ambiental.

4. **Desenvolvemento dunha economía** sostíble a través da diversificación de actividades económicas como o xeoturismo que xeran valor engadido. Ademais, estableceranse asociacións formais con partes interesadas locais que axudarán a identificar oportunidades de desenvolvemento de novos produtos e servizos turísticos, o que contribuirá á economía local.

IV. É importante contar ao longo do proceso de candidatura co asesoramento e colaboración da comunidade científica, de modo que se poida garantir a achega dos coñecementos e competencias que abarquen os diversos valores do ben.

V. O presente convenio de colaboración entre o Concello de Vigo e a Universidade de Vigo enmárcase na necesidade de traballar conxuntamente no desenvolvemento das accións incluídas na segunda liña de traballo antes exposta, de reforzo científico-técnico do expediente de candidatura.

VI. Dada a dimensión internacional do proxecto de candidatura, ambas institucións expresan o seu compromiso de establecer unha colaboración nos campos científico e técnico a prol da dita candidatura, de interese común, porque entenden que esta colaboración mellorará a eficiencia da xestión pública, facilita a utilización conxunta de medios e servizos e contribúe á realización deste proxecto de utilidade pública e transcendencia internacional.

VII. Ambas institucións consideran que a candidatura ten un interese público e social, tanto por ser liderado polo Concello de Vigo, onde se atopan as illas, como polo enfoque dado ao proxecto, que conxuga o obxectivo de promoción e conservación do ben co desenvolvemento turístico e medioambiental sostíble.

VIII. O Concello de Vigo e a Universidade de Vigo consideran que o proceso terá numerosos efectos positivos para o ben en concreto e para a cidade de Vigo e a súa contorna, sumando valor engadido á toda a Eurorrexión. Un recoñecemento internacional de enorme prestixio e transcendencia, que contribuirá á posta en valor e á promoción das Illas Cíes, dende o punto de vista ambiental.



**SERVIZO DE
TURISMO****CONCELLERIA DE
TURISMO****CONCELLO
DE VIGO****IX. As partes asinantes declaran:**

A. Que nin o Concello de Vigo, nin a Universidade de Vigo teñen vocación de mercado coa realización deste Convenio.

B. Que a través deste Convenio as entidades partícipes desenrolarán unha cooperación que garante que os servizos públicos que a cada unha lle compete préstanse de modo que ambas logran os obxectivos que teñen en común: o Concello de Vigo, a competencia para a conservación, protección e promoción turística, medio ambiental sostible das Illas Cíes e a xestión de actividades culturais e de ocupación do tempo libre e o turismo; a Universidade de Vigo, as competencias para a xeración, desenvolvemento, difusión, transferencia e intercambio do coñecemento e a aplicabilidade da investigación en todos os campos científicos.

Desta forma, ambas entidades teñen responsabilidades relacionadas co obxecto deste Convenio e ambas contribúen ao seu funcionamento cooperativo.

C. A cooperación realizada mediante este Convenio guíase unicamente por consideracións relacionadas co interese público; non existindo interese privado ou comercial e sí a consecución dun interese xeral.

X. Toda vez que o artigo 47.1 da Lei 40/2015, do 1 de outubro, do réxime xurídico do sector público, establece que o convenio é o instrumento con efectos xurídicos que asinan as administracións públicas, os organismos públicos e entidades de dereito público ou as universidades públicas entre si ou con suxeitos de dereito privado para a consecución dun fin común, propónse a sinatura do presente convenio ao fin de regular os termos da colaboración antedita con arranxo aos seguintes,

PACTOS**PRIMEIRO.- NORMATIVA APLICABLE E OBXECTO**

O presente convenio é de natureza administrativa, resultándolle de aplicación o disposto na Lei 39/2015, de 1 de outubro, do Procedemento Administrativo Común das Administracións Públicas e na Lei 40/2015, de 1 de outubro, de Réxime Xurídico do Sector Público.

O presente convenio ten por obxecto establecer as bases da colaboración entre o Concello de Vigo e a Universidade de Vigo para a realización dos proxectos e actividades necesarias para a consolidación da candidatura "Illas Cíes Xeoparque Mundial da UNESCO"

SEGUNDO.- OBXECTIVOS E ACTIVIDADES

Os obxectivos deste convenio están centrados en fortalecer a valorización e a xestión sostible do patrimonio xeolóxico das Illas Cíes e o municipio de Vigo a través da investigación e o desenvolvemento de estratexias de conservación e promoción que contribúan ao coñecemento, á protección e ao aproveitamento responsable dos recursos xeolóxicos locais.



**SERVIZO DE
TURISMO****CONCELLERIA DE
TURISMO****CONCELLO
DE VIGO**

O desenvolvemento deste traballo contribuirá ao recoñecemento e valoración do patrimonio xeolóxico das Illas Cíes, así como ao impulso de iniciativas de conservación, turismo sostible e desenvolvemento rexional

TERCEIRO.- FINANCIAMENTO DO CONVENIO

O Concello de Vigo contribuirá ao financiamento do proxecto cunha achega de 50.000,00 € (cincuenta mil euros), sendo quen ten a competencia última para promocionar e conservar as Illas Cíes e favorecer o desenvolvemento turístico e medioambiental sostible destas a través da candidatura candidatura "Illas Cíes Xeoparque Mundial da UNESCO" para conseguir súa integración na Rede Mundial de Xeoparques.

O importe comprometido por parte do Concello de Vigo realizarase con cargo á aplicación orzamentaria 4320.2279908 "Convenio UVigo Candidatura a Geoparque" do Concello de Vigo.

CUARTO. COMPROMISOS DAS PARTES.

Baixo o amparo deste acordo de Colaboración, a continuación detállanse as responsabilidades, funcións e principais actuacións, ás que se compromete cada unha das dúas entidades que conforman este acordo.

A) Compromisos da Universidade de Vigo

Como institución pública científico-técnica reforza o proceso da candidatura fomentando a cooperación entre ambas entidades para a consecución do desenvolvemento sostible do territorio. Este compromiso materializouse a través da creación e coordinación de dous comités esenciais: o Comité Xeocientífico e o Comité Socioeconómico. A cooperación entre a universidade e outras entidades oríentase cara ao obxectivo común de promover un desenvolvemento territorial sostible. A estrutura e operación dos comités Xeocientífico e Socioeconómico, reflicten un enfoque colaborativo e estratéxico entre Universidades, Centros de Investigación e o Concello de Vigo.

- Comité Xeocientífico

Baixo a coordinación de Irene Alejo e Gonzalo Méndez, do departamento de Xeociencias Mariñas e Ordenación do Territorio da Universidade de Vigo, este comité foi deseñado para impulsar o coñecemento xeolóxico e a investigación das Illas Cíes. A elección dos membros deste comité por Alejo e Méndez, e a súa posterior aprobación polo Concello de Vigo, aseguran que a equipa estea composta por persoas cunha alta cualificación e compromiso coa investigación e promoción do patrimonio xeolóxico.

A súa principal tarefa é avaliar e validar a información recollida sobre as Illas Cíes, complementar o coñecemento existente con novos datos e campañas de campo, e aportar información necesaria e coordinar o informe técnico que respalde a candidatura. Ademais, identificarán nichos de coñecemento para propor novas liñas de investigación, asegurando así que a candidatura non só estea fundamentada no coñecemento actual senón que tamén impulse a xeración de novo coñecemento.

- Comité Socioeconómico

Coordinado por Sebastián Villasante, un investigador recoñecido da Universidade de Santiago. Este comité enfócase en aspectos como a planificación estratéxica do turismo, a



**SERVIZO DE
TURISMO****CONCELLERIA DE
TURISMO****CONCELLO
DE VIGO**

valorización dos servizos ecosistémicos e a economía dos recursos naturais. A proposta de membros por parte de Villasante, seguida da súa aprobación polo Concello de Vigo, reflicte unha intención de reunir a expertos cunha visión ampla e multidisciplinar que poden contribuír significativamente á análise e desenvolvemento socioeconómico sostible do territorio.

A tarefa principal deste comité é ofrecer unha visión estratéxica sobre como potenciar o turismo e outros servizos ecosistémicos de maneira que beneficien tanto á economía local como á mantenza dos recursos naturais e a biodiversidade do territorio.

O Concello de Vigo exerce a presidencia dos Comités Xeocientífico e Socioeconómico (aprobados mediante Resolución da Concelleira de Área de Política Social Turismo e Xuventude en data 29/09/23), para unificar esforzos e aproveitar a experiencia multidisciplinar en apoio á candidatura. Por este motivo os comités asumen as seguintes funcións, enmarcadas dentro da folla de ruta da candidatura para o proxecto das Illas Cíes como Xeoparque Mundial da UNESCO aprobada en Xunta de Goberno Local en data 22 de setembro do 2023.

Para lograr este obxectivo, definíronse 3 eixos vertebrados que orientan as actividades planificadas: a investigación, para a catalogación e documentación do patrimonio xeolóxico, a educación enfocada na elaboración e difusión de materiais didácticos accesibles para estudantes e por último a promoción, que busca dar a coñecer e por en valor os recursos xeolóxicos, naturais e culturais do territorio ao público en xeral. O detalle das actuacións priorizadas para convenio detállanse a continuación. As actuacións sucesivas serán revisadas en Comisión de Seguimento.

ACTIVIDADES 2025

As actividades enmarcase dentro da folla de ruta da candidatura para o proxecto das Illas Cíes como Xeoparque Mundial da UNESCO aprobada en Xunta de Goberno Local en data 22.09.23.

Para lograr este obxectivo, definíronse 3 eixos vertebrados que orientan as actividades planificadas: a investigación, para a catalogación, estudo e documentación do patrimonio xeolóxico, a educación enfocada na elaboración e difusión de materiais didácticos accesibles para estudantes e por último a promoción, que busca dar a coñecer e por en valor os recursos xeolóxicos, naturais e culturais do territorio ao público en xeral. A continuación detállanse as actividades planificadas para esta anualidade en función de estes tres eixos.

❖ Eixo 1: Investigación

Este eixo céntrase na identificación, documentación estudo e valorización do patrimonio xeolóxico das Illas Cíes e a zona de Vigo.

1.1. Estudo comparativo do patrimonio xeolóxico das Illas Cíes e a súa singularidade en relación con outros xeoparques



SERVIZO DE
TURISMOCONCELLERIA DE
TURISMOCONCELLO
DE VIGO

- o **Obxectivo:** Argumentar con base científica a singularidade e complementariedade do patrimonio xeolóxico das Illas Cíes/Vigo en relación con outros xeoparques nacionais e internacionais. O estudo permitirá identificar os atributos comúns e distintivos do territorio, demostrando o seu valor singular dentro da rede de xeoparques.
- o **Descrición:** Como parte dos estudos requiridos para a candidatura a Xeoparque Mundial UNESCO segundo o establecido nas Directrices, realizarase unha análise comparativa do patrimonio xeolóxico das Illas Cíes/Vigo con outros xeoparques tanto rexionais, nacionais e internacionais. Para iso identificaranse territorios con características similares e analizaranse os trazos xeolóxicos comúns e distintivos. O estudos basearase nunha revisión bibliográfica, traballo de campo aplicando a metodoloxía científica. O obxectivo é evidenciar o valor diferencial do territorio, para xustificar a súa relevancia dentro da rede global de xeoparques UNESCO.

1.2. Organización dunha xornada de intercambio con outros xeoparques

- o **Obxectivo:** Facilitar a creación de redes e a colaboración con outros xeoparques mediante unha xornada de intercambio de experiencias. O evento permitirá compartir leccións aprendidas, destacar os elementos diferenciadores das Illas Cíes e buscar sinerxías para futuras iniciativas. Contarase coa participación de expertos nacionais e internacionais en xestión e valorización do patrimonio xeolóxico.
- o **Descrición:** Como parte das accións para fortalecer a candidatura, organizarase unha xornada de intercambio con representantes de xeoparques recoñecidos en España e a nivel internacional. O obxectivo é fomentar o diálogo, compartir boas prácticas e explorar posibles colaboracións. Invitarase a expertos en xestión de xeoparques, así como a unha figura destacada no ámbito da valorización socioeconómico do patrimonio xeolóxico.

1.3. Fomento da investigación académica nas Illas Cíes coa realización de TFG e TFM

- o **Obxectivo:** Fomentar a investigación académica sobre o patrimonio xeolóxico, natural e cultural das Illas Cíes mediante unha promoción de traballos de Fin de Grao (TFG) e traballos de Fin de Máster (TFM) que inclúan estudos de campo na zona.
- o **Descrición:** Establecemento de mecanismos de apoio e coordinación a realización de TFGs e TFMs relacionados coa xeodiversidade, a biodiversidade, os perigos naturais, cambio climático e a valorización



Copia do documento - Concello de Vigo	Data impresión: 18/07/2025 08:25	Páxina 8 de 16
8844-104	CSV: ACAD88-3C594C-B42B43-SRLN5N-BEVWX2-FD	
Pode validar e/ou obter copia electrónica do documento utilizando o código QR da esquerda ou o código de verificación na dirección http://www.vigo.org/csv		

SERVIZO DE
TURISMO

CONCELLERIA DE
TURISMO

CONCELLO
DE VIGO



socioeconómica do territorio. Proporcionaranse orientacións e asesoramento científico aos estudantes. Asimesmo, promoverase a recollida de datos de campo nas Illas Cíes, ademais de facilitar acceso a infraestruturas de investigación e recursos bibliográficos especializados para garantir a calidade e rigor dos estudos presentados.

❖ Eixo 2: Educación

Este eixo enfócase en transformar o coñecemento científico xerado polo comité de candidatura das Illas Cíes en recursos educativos dinámicos e accesibles para estudantes e xestores turísticos.

2.1. Curso de formación para guías do aspirante Xeoparque

- o **Obxectivo:** Capacitación a guías turísticos para ofrecer rutas interpretativas baseadas no patrimonio xeolóxico, natural e cultural das Illas Cíes.
- o **Descrición:** En colaboración co Parque Nacional das Illas Atlánticas, organizarase un curso de formación especializados para guías turísticos que operan dentro do parque nacional. Este programa inclúe formación teórica e práctica sobre a xeoloxía das Illas Cíes para mellorar a interpretación do territorio.

2.2. Lanzamento do programa educativo “Planeta Cíes Xeoparque”

- o **Obxectivo:** Implicar aos centros educativos na divulgación do patrimonio xeolóxico das Illas Cíes mediante a creación de proxectos escolares relacionados coa temática do Xeoparque.
- o **Descrición:** Diseñarase un programa educativo dirixido aos centros de secundaria do Concello de Vigo, que incluírá a entrega de material didáctico e a organización dunha exposición itinerante en cada centro participante durante unha semana. A mostra incluírá paneis informativos e recursos pedagóxicos específicos para o alumnado de secundaria. Ademais, impartirase charlas divulgativas sobre a importancia xeolóxica, ambiental e cultural das Illas Cíes. O programa incentivará a participación activa do alumnado a través dun concurso entre os centros inscritos, fomentando a creatividade e a investigación. Tamén está prevista a impresión de 1500 unidades didácticas para repartir entre os centros inscritos que facilitarán o traballo entre docentes e alumnado.



SERVIZO DE
TURISMO

CONCELLERIA DE
TURISMO

CONCELLO
DE VIGO



2.3. Organización de actividades de promoción do xeoparque nos campamentos urbanos

- o **Obxectivo:** Integración da temática do xeoparque nas actividades dos campamentos urbanos xa existentes organizados polo Concello de Vigo, no que se promova a educación ambiental e xeolóxica entre o público xeneral.
- o **Descrición:** En colaboración cos campamentos urbano organizados polo Concello de Vigo, incorporaranse actividades específicas relacionadas coa xeodiversidade e biodiversidade das Illas Cíes. Estas accións incluírán obradoiros, xogos, visitas guiadas e dinámicas en equipo, co obxectivo de fomentar o coñecemento sobre o patrimonio xeolóxico do territorio de forma lúdica e accesible. Asimesmo facilitaranse recursos educativos adaptados (material didáctico) para que os participantes adquiran unha comprensión máis profunda do valor do xeoparque.

❖ Eixo 3: Promoción

O obxectivo deste eixo é a difusión do patrimonio xeolóxico das Illas Cíes e o fortalecemento da candidatura a través de actividades de comunicación e divulgación.

3.1. Creación e dinamización das RRSS da candidatura

- o **Obxectivo:** Difundir e visibilizar a candidatura das Illas Cíes a Xeoparque Mundial UNESCO a través das redes sociais, fomentando a participación cidadá, a divulgación científica e a posta en valor do patrimonio xeolóxico e ambiental do territorio. Creando unha comunidade activa que siga o proceso da candidatura.
- o **Descrición:** Creación e xestión de perfís oficiais da candidatura en redes sociais (Facebook, Instagram, LinkedIn, Youtube) para compartir contidos divulgativos, actividades do proxecto e avances da candidatura. Durante o primeiro ano, levarase unha estratexia de comunicación baseada en publicacións periódicas con información sobre os valores xeolóxicos, ambientais e culturais do territorio, incluíndo entrevistas con expertos, retransmisión de eventos e difusión das iniciativas educativas e científicas.

3.2. Creación novos produtos turísticos e rutas xeolóxicas

- o **Obxectivo:** Promover un modelo de turismo sustentable que potencia a divulgación e coñecemento do patrimonio xeolóxico das Illas Cíes.





Desenvolveranse experiencias turísticas que combinen interpretación xeolóxica, conservación ambiental e valorización do territorio en colaboración con axentes locais.

- o **Descrición:** Deseño de novas rutas interpretativas que resalten a xeodiversidade e biodiversidade das Illas Cíes, incorporando mapas e folletos de sendeirismo educativos que inclúan os puntos de interese xeolóxico e natural. Asimemo, desenvolveranse paquetes xeoturísticos en colaboración con empresas de hostalaría, navieiras e outros operados locais, combinando visitas guiadas con experiencias gastronómicas e culturais vinculadas ao territorio. O lanzamento destes produtos turísticos incluírá unha estratexia de promoción para atraer visitantes interesado no turismo científico e natureza, fortalecendo a identidade do arquipélago como xeodistino de referencia.

3.3. Creación figuras representativas do Xeoparque

- o **Obxectivo:** Creación figuras representativas do Xeoparque que sievan como embaixadores do proxecto, facilitando a divulgación e interacción co público nos diferentes eventos e actividades realizadas.
- o **Descrición:** Elaboración dun discurso asociado a cada figura xeolóxica que simbolizará os diferentes elementos xeolóxicos das Illas Cíes. Estas figuras participarán en actividades de promoción, eventos divulgativos, etc. Asimesmo, estableceranse estratexias para incorporar estas figuras aos medios dixitais e redes sociais, para reforzar a identidade do Xeoparque.

A continuación, preséntase o orzamento correspondente a cada un dos tres eixos de traballo en función das actividades planificadas para a anualidade 2025:

Personal Propio de Uvigo (aportación Uvigo)	Irene Alejo (dedicación 10%, 12 meses)	Cofinanciación Uvigo
	Gonzalo Méndez (dedicación 10%, 12 meses)	Cofinanciación Uvigo
Contratos de servicio y/o de personal temporal para actuaciones del convenio	Investigador/a estudio comparativo	6.500,00 €
	Técnico/a de comunicación	5.000,00 €
	Divulgación en Charlas (Guías + Geo-planeta Cíes + Campamentos)	6.500,00 €
	Investigador Turismo y Economía: Diseño de productos GeoTurísticos	10.000,00 €
	Retribución TFG (pago de viajes de campo, análisis etc)	3.000,00 €



**SERVIZO DE
TURISMO****CONCELLERIA DE
TURISMO****CONCELLO
DE VIGO**

Gastos de Viajes	Viajes de membros do comité para reunións Vigo	3.000,00 €
	Viajes de ponentes para encontro de Geoparque	2.500,00 €
Servicios Empresas Externas	Contrato empresa deseño figuras promocionais	4.000,00 €
	Impresión Unidades	2.000,00 €
COSTES INDIRECTOS UVIGO 15%		7.500,00 €

B) Compromisos do Concello de Vigo

O Concello de Vigo asume a responsabilidade de realizar as accións pertinentes neste proceso de Candidatura.

- Coordinar a equipa de traballo da candidatura.
- Apoiar na dinamización ás mesas de traballo específicas e recompilación e elaboración do traballo resultante para a súa validación científica por parte da Universidade de Vigo.
- Aprobar e validar as accións que sexan deseñadas no ámbito do reforzo científico-técnico da candidatura.
- Levar a cabo campañas de sensibilización, dirixidas tanto á comunidade local como a visitantes potenciais, sobre o valor do Xeoparque e a importancia da súa conservación.
- Difundir as accións, tanto a nivel interno como externo, fomentando a creación de masa crítica e un alto índice de participación.
- Facilitará información sobre recursos, medios e programas específicos que poidan ser de interese para o desenvolvemento das diferentes actividades.
- Difundir a súa participación e colaboración en todas as actividades que se realicen no marco do Convenio, nos soportes habituais que utilicen para as súas actividades.
- Aportará no marco do Convenio, unha achega económica de 50.000,00 €.

QUINTA.- PAGAMENTO DA APORTACIÓN DO CONCELLO

O pagamento realizarase mediante transferencia bancaria á conta bancaria ES26 2080 5000 61 3110263753 de ABANCA Corporación bancaria, a nome da Universidade de Vigo, en dous pagos:

-O primeiro pago realizarase polo importe de 25.000,00 € á sinatura do convenio.

-O segundo pago realizarase polo importe de 25.000,00 € á entrega da acta do comité de seguimento prevista na cláusula sétima e da entrega dos traballos comprendidos no presente convenio.



**SERVIZO DE
TURISMO****CONCELLERIA DE
TURISMO****CONCELLO
DE VIGO****SEXTA.- XUSTIFICACIÓN E PAGAMENTO**

1.-A Universidade de Vigo deberá xustificar o cumprimento da finalidade obxecto para o que se concedeu. A tal efecto deberá presentar:

a) *Memoria de actuación*, que conterá a acta do comité de seguimento prevista na cláusula sétima, acreditativa do cumprimento dos traballos establecidos no presente convenio, así como a entrega dos traballos realizados, que deberá presentarse con anterioridade ao 20 de decembro de 2025.

b) *Memoria económica*, xustificativa do custo final das actividades realizadas no ano 2025 deberá presentarse con anterioridade ao 20 de decembro de 2025.

A memoria económica deberá conter un balance económico de gastos e ingresos finais e desviacións con relación ao orzamento inicial, con expresión de acredores, conceptos, importes e datas de emisión, e copias das facturas.

2.- A Universidade de Vigo deberá achegar electrónicamente conforme o artigo 14 da Lei 39/2015, do 1 de outubro, de procedemento administrativo común, as xustificacións, **a través da sede electrónica do Concello de Vigo**, por calquera dos mecanismos de identificación admitidos na sede electrónica.

SÉTIMA.- SEGUIMIENTO, VIXILANCIA E CONTROL DE EXECUCIÓN DO CONVENIO

A partir da sinatura do convenio creárase unha Comisión de Seguimento de carácter paritario, presidida pola Concelleira da área de Política Social, Turismo e Xuventude e a Concelleira delegada de Turismo e Xuventude composta polos presidentes dos Comités e pola xefa do Servizo de Turismo, que periodicamente avaliarán o desenvolvemento do convenio, interpretando e resolvendo as dúbidas que se desprendan do mesmo e que aprobarán, no seu caso, as modificacións na realización do traballo que por causas non previstas fora necesario introducir, que non afecten a partes esenciais. A dita comisión poderá invitar ás reunións a aquelas persoas que se estime pertinentes, con voz pero sen voto, ós efectos de asesoramento específico sobre calquera materia obxecto do presente convenio.

A Comisión de Seguimento reunirse, cando menos, unha vez cada dous meses, durante a vixencia do convenio. A dita Comisión poderá actuar ben mediante reunións presenciais, elevándose as correspondentes actas, ou polos medios telemáticos e/ou electrónicos oportunos.

A Comisión de Seguimento será a encargada de determinar e impulsar as accións específicas que permitan a máxima colaboración entre ambas institucións, cos obxectivos xa indicados.

A Comisión de Seguimento elaborará un acta de conformidade na que se acredite a correcta execución dos traballos previstos no presente convenio.

OITAVA.- PUBLICIDADE

**SERVIZO DE
TURISMO**

**CONCELLERIA DE
TURISMO**

**CONCELLO
DE VIGO**



A Universidade de Vigo debe dar a adecuada publicidade ao financiamento municipal da actividade mediante a incorporación do logotipo do Concello de Vigo e da imaxe corporativa do evento en todos o material e soportes publicitarios que edite.

A información sobre as actividades que se edite en idioma galego terá que ser revisada polo Servizo de Normalización lingüística do Concello de Vigo. En toda a información figurará o logotipo do Concello de Vigo e da Universidade de Vigo. Todo material editado deberá contar coa conformidade previa da CONCELLERÍA do Área de Goberno de Política Social, Turismo e Xuventude.

O presente Convenio será obxecto de publicidade no Portal de Transparencia das entidades asinantes, en aplicación do disposto no artigo 8. 1 b) da Lei 19/2013, de 9 de decembro, de Transparencia, Acceso á Información Pública e Bo Goberno.

NOVENA.- CUMPRIMENTO DA FINALIDADE

O cumprimento da finalidade que determinou o presente convenio deberá ser a axeitada á xustificación da mesma, que será comprobados pola Concellería de Turismo.

O incumprimento das obrigacións e compromisos asumidos por cada unha das entidades asinantes do presente convenio, determinará a resolución do mesmo e a entidade que non cumpre asumirá os danos acreditados que se deriven daquel. De non alcanzarse acordo expreso entre as partes, para o seu cálculo e abono estarase aos criterios establecidos polo artigo 34 da Lei 40/2015, do 1 de outubro, de Réxime Xurídico do Sector Público.

DÉCIMA.- VIXENCIA

O presente convenio terá vixencia anual ata o 31 de decembro de 2025 e non será prorrogábel.

DÉCIMO PRIMEIRA.- MODIFICACIÓN

O presente convenio poderá ser modificado mediante acordo expreso das entidades asinantes.

DÉCIMO SEGUNDA.- CONTROVERSIAS

A Concelleira da Área Política Social, Turismo e Xuventude queda facultada para resolver as posíbeis controversias derivadas da execución e interpretación deste convenio, para tomar iniciativas que contribúan ó seu cumprimento e desenvolvemento, así como para propoñer ou autorizar modificacións de actividades dos Eixos, sempre e cando ditas modificación non supoñan un incremento sobre o importe da transferencia prevista neste convenio.

En caso de controversias, as entidades asinantes se comprometen a colaborar en todo momento de acordo cos principios de boa fe e eficacia para asegurar a correcta execución do previsto neste convenio; conforme a elo, faranse os máximos esforzos para resolver de



**SERVIZO DE
TURISMO****CONCELLERIA DE
TURISMO****CONCELLO
DE VIGO**

forma amistosa calquera controversia que puidese xurdir na interpretación e cumprimento deste.

DÉCIMO TERCEIRA.- RESOLUCIÓN

O Convenio poderá resolverse en virtude das seguintes causas:

1. Pola finalización do período estipulado para a súa vixencia.
2. Por mutuo acordo das partes.
3. Polo incumprimento por algunha das partes de calquera das cláusulas establecidas no mesmo.

No suposto de extinción do Convenio, as accións específicas concertadas ao abeiro da mesma seguiranse desenvolvendo na forma, condicións e prazos previstos ata o seu total cumprimento.

4. Por decisión xudicial declaratoria da nulidade do convenio.
5. Por calquera outra causa distinta das anteriores prevista no convenio ou noutras leis.

O acordo de resolución establecerá o modo de finalizar e liquidar as actuacións pendentes de execución no momento de extinción do convenio.

DÉCIMO CUARTA.- PROTECCIÓN DE DATOS

A beneficiaria está informada de que os seus datos e os do seu representante serán incorporados aos ficheiros municipais; de que a finalidade da súa recollida é a instrución do procedemento para a concesión da subvención obxecto do presente convenio, a práctica das publicacións, comunicacións e notificacións de obrigado cumprimento. Os ditos datos serán tratados e protexidos de acordo co previsto na Lei 39/2015 e na Lei orgánica 3/2018, de 5 de decembro, de protección de datos persoais e garantía dos dereitos dixitais. A beneficiaria poderá exercer os dereitos de acceso, rectificación, cancelación e oposición ante o Concello de Vigo.

DÉCIMO QUINTA.- CONFIDENCIALIDADE

Ambas as partes comprométense a cumprir e facer cumprir o deber de segredo profesional e de confidencialidade, que abranguerá calquera información ou dato que se puidese coñecer con ocasión desta colaboración.

Os datos dos informes ou documentos, así como os resultados finais das mesas de traballo da candidatura ou calquera información derivada do proxecto terán carácter confidencial.

Cada unha das partes que pretenda utilizar os resultados parciais ou finais, en parte ou na súa totalidade, para a súa publicación como artigo, conferencia, congreso, etc., deberá solicitar a conformidade da outra parte por escrito. Calquera que sexa o modo de difusión,



**SERVIZO DE
TURISMO**

**CONCELLERIA DE
TURISMO**

**CONCELLO
DE VIGO**



respectarase sempre a mención dos autores ou autoras do traballo en cuestión e farase expresa mención ao presente convenio, figurando as dúas institucións asinantes do presente convenio.

E en proba de canto antecede, as partes que interveñen asinan o presente convenio por duplicado e a un só efecto no lugar e na data sinalados no seu encabezamento.

DÉCIMO SEXTA. - XURISDICIÓN COMPETENTE

O presente convenio queda excluído do ámbito de aplicación da Lei 9/2017, do 8 de novembro, de Contratos do Sector Público, rexerase polas súas propias cláusulas, aínda que resultará de aplicación supletoria a fin de cubrir as lagoas de interpretación que puidesen xurdir, conxuntamente coas normas xerais do dereito administrativo.

As cuestións litixiosas ás que poida dar lugar a interpretación, modificación, efectos ou resolución do contido do presente convenio específico de colaboración que non foran resoltas pola comisión de seguimento prevista no pacto quinto do convenio, someteranse á xurisdición contencioso-administrativa, de conformidade co disposto na Lei 29/1998, de 13 de xullo, reguladora da citada xurisdición.

A Concelleira de Área Política Social,
Turismo e Xuventude

Asdo.: Yolanda Aguiar Castro

O Reitor Magnífico da Universidade de
Vigo

36023985M
MANUEL JOAQUÍN
REIGOSA (R:
Q8650002B)
Firmado digitalmente
por 36023985M MANUEL
JOAQUÍN REIGOSA (R:
Q8650002B)
Fecha: 2025.07.16
12:01:27 +02'00'

Asdo.: Manuel Joaquín Reigosa Roger



Copia do documento - Concello de Vigo	Data impresión: 18/07/2025 08:25	Páxina 16 de 16
8844-104	CSV: ACAD88-3C594C-B42B43-SRLN5N-BEVWX2-FD	
Pode validar e/ou obter copia electrónica do documento utilizando o código QR da esquerda ou o código de verificación na dirección http://www.vigo.org/csv		